

## CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE RIBADEO PARA ACTIVIDADES DE PROMOCIÓN DO TURISMO DE GALICIA NA XI EDICIÓN DA FESTA DE INDIANOS EN RIBADEO

### MEMORIA XUSTIFICATIVA

O xerente de Turismo de Galicia

#### DECLARA:

Que esta Axencia de Turismo de Galicia formalizou co Concello de Ribadeo o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2026.

Que o instrumento convencional ten por obxecto establecer o marco de colaboración para a promoción do turismo de Galicia a través do apoio e posta en valor de distintas actuacións de promoción turística no Concello de Ribadeo con motivo da celebración do Ribadeo Indiano.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Axencia de Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



**Segundo.-** O Concello de Ribadeo perseguen resaltar e mostrar dunha forma didáctica e respectuosa o seu patrimonio a través de diversos produtos turísticos que veñen marcados pola calidade, o coñecemento e a interpretación e o respecto ao patrimonio e a diferenciación de Ribadeo. Unha das premisas é involucrar á sociedade, ao sector servizos e ocio, a hostalería, a restauración, etc... capacitándoo aos diferentes actores para exercer de guías de excepción coma complemento á súa actividade habitual.

Así mesmo, o proceso de desenvolvemento de Ribadeo a principios do século XX preséntase claramente relacionado co fenómeno da emigración, en canto que supón un gran pulo para o crecemento económico da vila, así como no seu carácter sociocultural. Entre finais do século XIX e comezos do XX, Ribadeo viviu un intenso proceso migratorio cara América. O retorno dunha parte destes emigrantes deixou una profunda pegada urbanística, social e económica coñecida como "legado indiano".

Ribadeo é o municipio galego con maior proporción de arquitectura indiana, ademais de contar cun importante patrimonio inmaterial asociado á emigración.

Nestes casos aparece a figura do indiano, ou emigrante a América retornado, que deixou o seu sinal de identidade na súa terra de orixe, con importantes doazóns e envíos de diñeiro, durante o seu período de estanza en América (fundamentalmente en Cuba, Arxentina, Uruguai, Porto Rico, México) e con actos de filantropía que fixeron tanto dende aqueles países que os acolleron, como dende aquí os xa retornados.

Aproveitando un rico escenario arquitectónico, e coa intención de rememorar vellos tempos, preténdese facer do Ribadeo do século XXI un escenario onde localizar un ambiente propio de principios do século XX recreando unha sociedade claramente influenciada pola cultura, tradicións e modas traídas polos indianos.

Este evento do RIBADEO INDIANO pretende dar a coñecer e á vez valorar o legado que a emigración deixou na nosa sociedade: un importante patrimonio arquitectónico, tanto en arquitectura doméstica como pública (escolas, casinos, cines, cemiterios, fontes, igrexas, etc), e unha influencia nas sociedades da época, na industrialización, o comercio, a moda, os costumes, a gastronomía...



**Segundo.-** Ribadeo Indiano é un evento histórico-cultural consolidado desde 2014 que ten como finalidade a posta en valor do legado da emigración, especialmente o fenómeno indiano, elemento diferenciador da identidade ribadense.

O proxecto combina recreación histórica, programación cultural, participación cidadá e dinamización económica, converténdose nunha ferramenta estratéxica de cohesión social, valorización patrimonial e desestacionalización turística.

A XI edición reforza a dimensión cultural, académica e participativa do evento, consolidándoo como referencia no panorama galego e nacional. Esta edición celebrarase do 10 ao 12 de xullo de 2026, e buscará afianzar o Ribadeo Indiano como un evento cultural de referencia que poña en valor o legado emigrante e contribúa á dinamización social e económica do territorio.

Deseguido descríbense as actividades que se levarán a cabo:

1. Acto inaugural

- Pregón institucional.
- Actuación musical do Coro Infantil e Xuvenil Sagrado Corazón.

2. Programación musical

Participación das seguintes formacións que representan a fusión cultural atlántica: Mediarea, Cuarteto Illa Pancha, Tabernarias, Septeto To´mezclao, Mariachis Son de Galicia, Banda Municipal de Música de Ribadeo, Amizades, Coral Polifónica de Ribadeo, El Mura y su Timbre Latino, Bandidos, Amigos da Gaita e Estrellas de Buena Vista.

3. Conferencias e actividades divulgativas

- Charlas especializadas sobre migración e legado indiano.
- Encontros interxeracionais.

4. Actividades complementarias

- Mercado de produtos de ultramar.
- Exhibición de vehículos clásicos "haigas".
- Recreación histórica ambiental.
- Actividades infantís.



- Paseos culturais guiados.
- Exposicións temáticas.
- Xantar campestre popular.
- Xincana temática.
- Exhibicións tradicionais (dominó, petanca, billarda).

O apoio ás festas locais é unha das liñas estratéxicas de traballo de Turismo de Galicia, por considerar este tipo de eventos como un elemento esencial para o desenvolvemento turístico de Galicia no que atinxe á divulgación da oferta turística galega, vinculada aos extraordinarios recursos turísticos deste país e impulsando así a mellora económica do sector.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

